

## Part 7: Le vibrassion

Motobin amportant an natura a son ij moviment vibratòri e soe composission, che a ven-o analisà. As vëdd èdcò l'arsonansa ant le ossilassion forsà, e quaicòs dla propagassion d'energia mecanica travers le onde ant ij còrp.

### TAULA DLA PART CH'A FA SET

Moviment periòdich.....	199
Moviment armònic.....	199
Ossilassion smortà .....	199
Composission e scomposission dle ossilassion .....	201
Scomposission d'un moviment periòdich qualonque .....	201
Composission.....	202
Dinàmica dle vibrassion.....	205
Ossilassion forsà.....	206
Arsonansa.....	207
Ossilator cobia.....	208
Propagassion pér onde .....	209
Propagassion èd n'impuls longitudinal .....	209
Propagassion trasversal longh na còrda .....	210
Dinàmica dl'onda trasversal.....	211
Trasferiment d'energia pér onde .....	212
Assurbiment .....	213
Anterferensa d'onde.....	213
Riflession dj'onde .....	215

TAULA DLE FIGURE DLA PART CH'A FA SET

Figura 1 – Ossilassion smortà.....	200
Figura 2 – Scomposission d'un moviment periòdich.....	201
Figura 3 – Adission èd doe ossilassion a frequensa motobin diferenta.....	203
Figura 4 – Modulassion d'ampièssa .....	204
Figura 5 – Ampièssa e fase antorna a l'arsonansa .....	208
Figura 6 – Ossilator cobià .....	208
Figura 7 – Propagassion longitudinal èd n'impuls .....	209
Figura 8 – Propagassion èd na përturbassion trasversal.....	210
Figura 9 – Longhëssa d'onda .....	210
Figura 10 – Dinàmica dl'onda trasversal .....	211
Figura 11 – Anterferensa d'onde concorde .....	214
Figura 12 – Anterferensa d'onde dëscòrde.....	215

## MOVIMENT PERIÒDICH

Un moviment a l'é ciamà periòdich cand, a intervalj èd temp  $T$  costant, l'oget an moviment a arpija na dàita posission e ant ògni interval a arpét sempe èl moviment a l'istessa manera. A cost propòsit, i l'oma dësgià vist, an Cinemàtica, èl moviment armònic, che a l'é èl pì sempì èd costi moviment. I l'oma èdcò studià èl moviment d'un pèndol, che a l'é ancora un moviment armònic, almanch con aprossimassion motobin bon-a.

Ant lë spirit dë ste nòte, i voroma nen dì tut lòn che a-i sarìa da dì a propòsit dë stì moviment, che a peulo esse ant un-a, doe ò tre dimension, ma is limitoma ai cas pì comun (che a son èdcò coj ch'a peulo vnì pì a taj an pràctica).

### Moviment armònic

Com i l'oma dit, i l'oma già vist sto moviment an Cinemàtica, coma proiession su un diameter d'un moviment circolar costant. A l'é èl moviment su na diression, d'un pont che a vibra antorna a na posission d'echilibri, Lë spassi an fonsion dël temp a arsulta na sinusòid e a peul esse scrit coma:

$$x = A \cdot \sin(\omega \cdot t + \vartheta) \quad \text{andova :}$$

$A$  a l'é èl massim spostament da la posission d'echilibri

$\omega = 2 \cdot \pi \cdot f$  a l'é la velocità angolar dël moviment circolar supòst coma origin dla vibras ion

e  $f$  a l'é antlora èl númer èd gir al second (ò osilassion al second) e a - i diso *Frequensa*

$\vartheta$  a l'é na costant che a dipend dal pont èd partensa dël moviment, amportanta pér paragoné

doi moviment fra 'd lor. Angol dël ragg dël moviment circolar al temp pijà coma zero

An Cinemàtica i l'oma vist quale che a son velocità e accelerassion. Suponoma che a vibré a sia ma massa  $m$ . Sto moviment a riva da l'integrasion èd l'equassion:

$$m \cdot \ddot{x} = -k \cdot x \quad \text{butand} \quad \omega^2 = \frac{k}{m}$$

Donca èl moviment as produv cand an sla massa a agiss na fòrsa elastica èd cole che i l'oma vist, che a l'é proporsional a lë spostament da la posission d'echilibri e a tira a apòrté la massa an costa posission. An coste condission la massa a vibrerà an manera andefinìa antorna a soa posission d'echilibri.

### Osilassion smortà

An pràtica, tute le ossilassion libere coma cole dëscrite, a ancontro resistense passive che a fan perde energia pì ò manch ampressa. Com a peul sucède, suponoma che la fòrsa èd resistensa a dipenda da la velocità dla massa. Antlora l'equassion èd partensa a dventa:

$$m \cdot \ddot{x} = -k \cdot x - r \cdot \dot{x} \quad \text{e as peul buté} \quad \omega^2 = \frac{k}{m} \quad \text{e} \quad 2 \cdot \delta = \frac{r}{m}$$

Oltra che la fòrsa d'arciam vers la posission d'echilibri, an sla massa adess a agiss èdcò la fòrsa èd resistensa. L'equassion a dventa:

$$\ddot{x} + 2 \cdot \delta \cdot \dot{x} + \omega^2 \cdot x = 0$$

El risultà dl'integrazion dë st'equassion diferencial a dipend dal valor dle costant  $k, r, \omega^2, \delta$ , che a son sempe positive, ( $\delta$  a ven ciamà coeficent dë smortament) e a-i son ij tre cas:

$$\text{Pér } \delta < \omega \quad x = e^{-\delta t} \cdot A \cdot \cos(\alpha \cdot t + \vartheta) \quad \text{andova} \quad \alpha = \sqrt{\omega^2 - \delta^2}$$

$$\text{Pér } \delta = \omega \quad x = e^{-\delta t} \cdot (A + B \cdot t)$$

$$\text{Pér } \delta > \omega \quad x = e^{-\delta t} \cdot (A \cdot e^{\beta \cdot t} + B \cdot e^{-\beta \cdot t}) \quad \text{andova} \quad \beta = \sqrt{\delta^2 - \omega^2}$$

Introma nen ant la tecnica èd solussion dl'equassion, ma i arportoma an figura 1 ij tipo èd grafich che as oten-o ant ij tre cas.




Figura 1 – Ossilassion smortà

Mach ant el prim cas a-i é ancora n'ossilassion, ma as peul nen disse che a sia periòdica. A-i è un interval èd temp T costant pér el passagi dal pont d'echilibri ant la stessa diression, ma a sto pont la velocità a diminuiss vira pér vira. L'interval T a l'é pì long èd col che a sarìa stabili mach da massa e coeficent elàstich. El massim dl'ossilassion a diminuiss an manera esponensial con el temp.

As vèdd che l'ampièssa a cala coma  $e^{-\delta t}$  e el temp fra un passagi e l'àutr da la posission d'echilibri a l'é:

$$T = \frac{2 \cdot \pi}{\sqrt{\omega^2 - \delta^2}} \quad \text{anvece che} \quad T = \frac{2 \cdot \pi}{\omega}$$

Sto temp a ven ancora ciamà “*period*” e a l'é pì longh èd col che i l'avriò sensa smortament. Cand  $\delta = \omega$  as vèdd che  $T$  a perd so significà e donca ‘l moviment a l'é pì nen periòdich.

## Composition e scomposission dle ossilassion

An Cinemàtica i l'oma già vist quaicòs dla composition èd doi moviment armònich particular, sì i vardoma la còsa da na mira pì general.

### Scomposission d'un moviment periòdich qualonque

As peul dëmostré che qualonque moviment periòdich a l'é l'adission èd moviment armònich a frequensa diferenta. Pì percis, ògni moviment periòdich, con period  $T$ , a peul esse dëscrit coma l'adission d'un moviment arrònich che a l'abia l'istess períòd  $T$ , pì n'anfinità èd moviment arrònich, ognidun con un period che a l'é sota-multipl anter èd  $T$ . Le ampiësse 'd costi moviment, e soe fasi, che a peulo èdcò esse zero, a determino la forma dl'ossilassion adission. Sòn a veul dì che qualonque moviment periòdich a peul esse scrit coma:

$$x(t) = \sum_{n=0}^{\infty} A_n \cdot \cos(n \cdot \omega \cdot t + \vartheta_n)$$

Costa a ven ciamà la “*série èd Fourier*” che a svilùpa la fonsion  $x(t)$ . A parte da la fonsion  $x(t)$  as peulo trové le costante  $A_n$  e  $\vartheta_n$ . Stoma nen sì a vèdde sto svilup an serie, bele che a sia n'èstrument motobin amportant ant l'estudi èd tuti ij sistema periòdich, dal moment che i l'oma già parlare a propòsit èd nòstre nòte d matemàtica.

An pràtica, pér le ossilassion che a n'interesso, èl nùmer dij termo d'adission a l'é cit, e tuti j'autri a l'ha ampiëssa zero. La figura 2 a mostra n'esempi.




Figura 2 – Scomposission d'un moviment periòdich

Le ossilassion con frequensa multipla antrega èd na dàita ossilassion as ès-ciamo soe armòniques. As nòta che n'onda quadra a l'é fàita da l'onda fondamentàl e soe armòniques pari ( $2\omega$ ,  $4\omega$ ,  $6\omega$ , etc.), mentre n'onda tiangolar a l'é fàita da l'onda fondamentàl e soe armòniques dispari ( $3\omega$ ,  $5\omega$ ,  $7\omega$ , etc.). A l'é natural che l'ampièssa dle armòniques a l'é essensial.

## Composition.

I l'oma vist n'esempi, an Cinemàtica d'adission èd doi moviment armònics con l'istessa ampièssa, con istessa diression e frequense pòch diverse (batiment), peui i l'oma vist quàich particolar cas d'adission èd doi moviment normaj fra èd lor. Sì is limitoma a doi moviment armònics an sl'istessa diression. Pér ciairèssa arpetroma èdcò quaicòs ch'i l'oma già dit. An general ij doi moviment a saran:

$$x_1 = A_1 \cdot \cos(\omega_1 \cdot t + \vartheta_1) ; \quad x_2 = A_2 \cdot \cos(\omega_2 \cdot t + \vartheta_2)$$

Adëss i vëddoma vâire cas d'anteresse èd composition dë sti moviment.

## Doi moviment con l'istessa frequensa

Ant l'ipòtesi che  $\omega_1 = \omega_2$  l'adission dij doi moviment, accordand le fòrmule trigonometriche d'adission e sotrassion, che sì i stoma nen a arporté, a arsulta ancora un moviment con l'istessa frequensa, dont ampièssa massima  $A$  e fase  $\theta$  a son dàite da:

$$A = \sqrt{A_1^2 + A_2^2 + 2 \cdot A_1 \cdot A_2 \cdot \cos(\vartheta_2 - \vartheta_1)}$$

$$\tan \theta = \frac{A_1 \cdot \sin \vartheta_1 + A_2 \cdot \sin \vartheta_2}{A_1 \cdot \cos \vartheta_1 + A_2 \cdot \cos \vartheta_2}$$

Se ij doi moviment a son an fase ( $\vartheta_1 = \vartheta_2$ ) le doe ampièsses as adission-o, se ij doi moviment a son an oposission ( $\vartheta_1 = \pi + \vartheta_2$ ) le doe ampièsses as sotrao. Ant j'autri cas l'ampièssa a pija un valor antrames.

## Doi moviment con peròd diferent ma con-misurabij

An cost cas ij doi peròd a son taj che  $m \cdot T_1 = n \cdot T_2$  andova  $m$  e  $n$  a son doi nùmer antregh. Se as pijo ij doi nùmer pì cit che a sodisfo la condission, i l'oma:  $m \cdot T_1 = n \cdot T_2 = T$ . Èl moviment che a arzulta a l'é nen armònic, ma a l'é periòdic, e a l'ha peròd ugual a  $T$ .

Se adess i consideroma un moviment con peròd  $T_0$  e tuti ij moviment con peròd  $\frac{T_0}{2}, \frac{T_0}{3}, \frac{T_0}{4}, \dots, \frac{T_0}{n}, \dots$  etc. e j'adissionoma, otnoma un moviment periòdic, e is trovoma ant èl cas opòst dla scomposission d'un moviment periòdic qualunque.

## Doi moviment con peròd nen con-misurabij

An efét, se le condission viste prima a son nen sodisfaite, la composition a dà nen un moviment periòdic. An ògni meud, a-i son almanch doi cas anteressant da analisé èdcò cand ij doi peròd a son qualunque. Ij vëddoma sì sota..

## Doi moviment con frequensa pòch diferenta

Sta composition a l'é già stàita vista an Cinemàtica. Lì i l'oma fàit na tratassion analítica dël fenòmeno, mentre sì i doma na giustificassion lògica. Suponoma doe frequense quasi uguale, pr'esempi 100 Hz e 101 Hz e suponoma che ij dij moviment a parto an fase. La composition a l'avrà n'ampièssa che a l'é l'adission dle doe ampièsses e donca a l'é la massima.

El prim moviment a l'ha un períod  $T_1 = \frac{1}{f_1} = 0,01$  [sec], mentre l'èscend moviment a l'avrà un períod  $T_2 = \frac{1}{f_2} = 0,099099\dots$  [sec]. Se i pijoma  $T_2$  com arferiment, i podoma dì che l'èscend moviment a l'ha períod  $T$  e el prim  $T + \Delta T$ . Parej, dòp un períod  $T$  da l'inissi, mentre l'èscend moviment a l'ha “fàit” n'angol èd  $2\pi$ , el prim a l'è sfasasse, pérchè so angol a l'è  $2\pi \cdot T/(T + \Delta T)$  con na diferensa èd :

$$\theta = 2 \cdot \pi \cdot \frac{\Delta T}{T + \Delta T}$$

A ògni períod l'angol d'ësfasament a chërs dë sta quantità. A na dàita mira  $\theta$  a dventa motobin davsin a  $\pi$ . Sòn a càpita dòp  $n$  períod, con  $n$  tal che:

$$\pi = 2 \cdot \pi \cdot n \cdot \frac{\Delta T}{T + \Delta T} ; \quad n = \frac{T + \Delta T}{2 \cdot \Delta T}$$

A sta mira ij doi moviment a son an oposission e donca l'ampièssa dla composission a l'è minima- Dòp àtri  $n$  períod  $T$  ij doi moviment a torno an fase e la composission a l'ha torna un massim. Donca la variassion dl'ampièssa a l'è periòdica con un period  $\Gamma$  che a val:

$$\Gamma = T \cdot \frac{T + \Delta T}{\Delta T}$$

La frequensa dla variassion dl'ampièssa a l'è antlora:

$$\Phi = \frac{1}{\Gamma} = \frac{\Delta T}{T^2 + T \cdot \Delta T}$$

### Doi moviment con frequensa motobin differenta

Se ij doi moviment a son adissionà, as oten mach na ossilassion (cola a frequensa àuta) che a cambia valor sentral con l'andament che a l'ha ampièssa e frequensa istesse a l'ossilassion a frequensa bassa..




Figura 3 – Adission èd doe ossilassion a frequensa motobin differenta

Se anvece as fa an manera che l'ampièssa dl'ossilassion a frequensa àuta  $f$  a l'abia n'andament che a varia periodicament con la frequensa bassa  $\Phi$ , as oten lòn che as ciama la

modulassion d'ossilassion a frequensa pì àauta con cola a ferquensa pì bassa. An particolar sta modulassion a ven ciamà “**Modulassion d'ampiëssa**”. Son as esprim, da na mira matemàtica, con:

$$x = [A + B \cdot \cos(2 \cdot \pi \cdot \Phi \cdot t)] \cdot \cos(2 \cdot \pi \cdot f \cdot t)$$

Andova  $A$  al'è l'ampiëssa media dla frequensa àuta, e  $B$  a l'è l'ampiëssa dla variassion d' $A$ . Se  $A$  e  $B$  a son istess, l'ampiëssa d' $x$  a va da 0 a  $2 \cdot A$  e la modulassion as dis al 100%. La figura 4 a mostra sto cas. I l'oma dit che le doe frequense a deuvo esse tant diferente, an realità sòn a l'è nen rigoros, ma al'è l'ipòtesi che i foma.




Figura 4 – Modulassion d'ampiëssa

Acordoma, da la prima part d'ëste nòte (antrodussion matemàtica), che:

$$\cos \alpha \cdot \cos \beta = \frac{1}{2} [\cos(\alpha + \beta) + \cos(\alpha - \beta)]$$

e donch nòstra expression a dventa:

$$x = A \cdot \cos(\omega \cdot t) + \frac{A}{2} \cdot \cos[\omega \cdot t + \Omega \cdot t] + \frac{A}{2} \cdot \cos[\omega \cdot t - \Omega \cdot t]$$

Sòn a veul dì che l'onda modulà da na sinusòid a l'è echivalenta a l'adission èd tre onde, dont la prima a l'è l'onda midema, mentre le àutre doe a son le “onde lateraj”, ognidùn-a con n'ampiëssa metà dl'ampiëssa dl'onda che a mòdula, l'un-a con na frequensa spostà an bass, rispèt a l'onda modulà, dla frequensa dl'onda che a mòdula e l'àutra con na frequensa spostà an àut dla stessa quantità.

## DINÀMICA DLE VIBRASSION

L'origin dle vibrassion a l'é la fòrса elàstica. Se na massa  $m$  a l'ha na posission d'echilibri stabil ant un camp èd fòrse elastiche, vis-a-dì fòrse proporsionaj a lë spostament da la posission d'echilibri, e a ven lassà llibera, èl moviment che as produv a l'é na vibrassion. Se a-i son nen resistense, l'equassion dël moviment a sarà, second le lèj èd Newton:

$$m \cdot \ddot{x} = k \cdot x$$

La solussion dë st'equassion diferensial, second lòn che i l'oma vist, a l'é:

$$x = A \cdot \cos(\omega \cdot t + \vartheta)$$

andova  $A$  e  $\theta$  a son costant d'integrazion, che a dipendo dai valor inissiaj èd posission e velocità, mentre  $\omega = 2 \cdot \pi \cdot \frac{1}{T}$  con  $T$  che a val  $T = 2 \cdot \pi \cdot \sqrt{\frac{m}{k}}$ .

Na còsa simil a val pér moviment èd rotassion (elasticità èd torsion). L'acelerassion linear  $\ddot{x}$  a ven sostituìa da cola angolar  $\ddot{\alpha}$  e la massa  $m$  dal moment d'inersia  $J$ .

I l'oma vist che un pendol che a fasa cite ossilassion as compòrtta a l'istessa manera. Le cite ossilassion a pèrmètto l'aprossimassion èd consideré la fòrса d'arciam coma fòrса elastica.

As vèdd che tant pì la massa a l'é grossa e/ò la reassion elàstica a l'é cita, tan pì èl period a l'é longh, coma i savoma da l'esperiensa.

Se i vardoma la còsa da la mira dla conservassion dl'energia, i podoma dì che a lë spostament massim, andova la velocità a l'é zero, tuta l'energia a l'é potensial (elàstica) e la velocità a dventa zero, mentre cand la massa a passa da la posission d'echilibri l'energia potensial a l'é zero e la velocità a l'é massima (massim dl'energia cinética).

L'energia potensial socià al camp èd fòrse elàstiche (che a dipendo mach da l'ëspostament e nen da la massa), coma i l'oma vist ant la part ch'a fà sinch, a l'é dàita da:  $E_e = \frac{1}{2} \cdot k \cdot x^2$ , mentre l'energia cinética a sarà sempe  $E_c = \frac{1}{2} \cdot m \cdot \dot{x}^2$  e donca i l'avroma:

$$\frac{1}{2} \cdot k \cdot x^2 + \frac{1}{2} \cdot m \cdot \dot{x}^2 = \text{cost}$$

Se la fonsion  $x$  a l'é dla forma  $x = A \cdot \cos(\omega \cdot t + \vartheta)$ , sostitoend as oten:

$$\frac{1}{2} \cdot k \cdot A^2 \cdot \cos^2(\omega \cdot t + \vartheta) + \frac{1}{2} \cdot m \cdot A^2 \cdot \omega^2 \cdot \sin^2(\omega \cdot t + \vartheta) = \text{cost}$$

Costa equassion a l'é sodisfàita se  $k = m \cdot \omega^2$  e donca se  $T = 2 \cdot \pi \cdot \sqrt{\frac{m}{k}}$  coma i l'avio già vist.

L'istess rasonament a peul esse fàit pér ma massa che a vira antorna a n'ass, com i l'oma già dit. A basta ten-e cont che la massa a ven sostituìa dal moment d'inersia rispét a col ass e la costant elàstica a peul esse, pr'esempi, cola èd torsion.

## Ossilassion forsà

Suponoma adess un sistema elàstich real che daspèrchié a sarìa un sistema ossilant smortà, coma col che i l'oma già vist prima. A sto sistema aplicoma na fòrsa, pér adéss generica,  $f(t)$ . An costa manera l'equassion che a dëscriv èl moviment dël sistema a dventa:

$$m \cdot \ddot{x} + r \cdot \dot{x} + k \cdot x = f(t)$$

che a peul esse scrivùa, con le posission viste fin-a sì, coma:

$$\ddot{x} + 2 \cdot \delta \cdot \dot{x} + \omega^2 \cdot x = f(t)$$

La solussion èd costa equassion diferensial, che a l'é nen omogenia, a l'é dël tipo  $x = x_0 + x_I$  andova  $x_0$  a l'é l'integral general dl'equassion omogenia (cola che as oten butand  $f(t) = 0$ ), e  $x_I$  al'è n'integral particolar qualonque dl'equassion completa (vardé le nòte 'd matemàtica). Èl termo  $x_0$  a arpresents l'ossilassion lìbera smortà dël sistema. I l'oma già vistla e notoma che sto termo, dòp un period inissial, a va a zero e a anfluiss pì nen.

Pér èl termo  $x_I$  i notoma che a l'é d'anteresse cand la fòrsa  $f(t)$  aplicà a l'é armònica, vis-a-dì dël tipo  $f(t) = F \cdot \cos(\Omega \cdot t)$ . Se i butoma  $\Phi = \frac{F}{m}$ , l'equassion a dventa:

$$\ddot{x} + 2 \cdot \delta \cdot \dot{x} + k \cdot x = \Phi \cdot \cos(\Omega \cdot t)$$

La solussion general èd costa equassion a l'é dël tipo:

$$x = x_0 + x_I = A_0 \cdot e^{-\delta \cdot t} \cdot \cos(\alpha \cdot t + \delta) + A \cdot \cos(\Omega \cdot t - \vartheta)$$

$$\text{i notoma an ciàir che } x_I = A \cdot \cos(\Omega \cdot t - \vartheta)$$

Se i consideroma l'equassion a regim, vis-a-dì dòp un temp a basta long da podèj consideré èl prim termo dlé scond member bastansa davzin a zero da pì nen anfluì, a basta stabili èl valor d'A e èd  $\theta$  pér arzolve nòstr problema.

Pér trové sti valor i consideroma che  $x_I$  a venta che a sia solussion dl'equassion  $x = x_0 + x_I$  e, dal moment che:

$$\dot{x}_I = -\Omega \cdot A \cdot \sin(\Omega \cdot t - \vartheta) \quad \text{e} \quad \ddot{x}_I = -\Omega^2 \cdot A \cdot \cos(\Omega \cdot t - \vartheta)$$

i podoma scrive che:

$$-\Omega^2 A \cdot \cos(\Omega \cdot t - \vartheta) - 2 \cdot \delta \cdot \Omega \cdot A \cdot \sin(\Omega \cdot t - \vartheta) + \omega^2 \cdot A \cdot \cos(\Omega \cdot t - \vartheta) = \Phi \cdot \cos(\Omega \cdot t)$$

e cheujend a fator comun:

$$(\omega^2 - \Omega^2) \cdot A \cdot \cos(\Omega \cdot t - \vartheta) - 2 \cdot \delta \cdot \Omega \cdot A \cdot \sin(\Omega \cdot t - \vartheta) = \Phi \cdot \cos(\Omega \cdot t)$$

Costa espression a venta che a sia sodisfàita pér ògni valor èd  $t$ , e an particolar: pér  $\Omega \cdot t - \vartheta = 0$  a dventa:

$$(\omega^2 - \Omega^2) \cdot A = \Phi \cdot \cos \vartheta$$

pér  $\Omega \cdot t - \vartheta = \frac{\pi}{2}$  a dventa:

$$-2 \cdot \delta \cdot \Omega \cdot A = -\Phi \cdot \sin \vartheta$$

Da coste espression as arcava, sensa fé tuti ij passagi:

$$A^2 = \frac{\Phi^2}{(\omega^2 - \Omega^2)^2 + 4 \cdot \delta^2 \cdot \Omega^2} ; \quad \tan \theta = \frac{2 \cdot \delta \cdot \Omega}{\omega^2 - \Omega^2}$$

A sta mira accordoma che  $\delta = \frac{r}{m}$  andova  $r$  a l'é el coeficent dël termo èd resistensa passiva.

Acordoma èdcò che  $\omega$  a l'é la pulsassion natural dël sistema e  $\Omega$  a l'é la pulsassion dla fòrsa esterna.

## Arsonansa

As vèdd da l'espression dl'ampièssa dl'ossilassion a regim, che se  $\Omega$  a dventa istess a  $\omega$ , èl denominator a l'ha un valor minim, e donca l'ampièssa a l'é massima. A stabilì st'ampièssa però, a concor èdcò el fator d'ësmortament  $\delta$ .

Vardoma da na mira analitica còs a suced. Pijand l'espression dl'ampièssa, i podoma prima divide numerator e denominator pér  $\omega^4$ . As oten:

$$A^2 = \frac{\frac{\Phi^2}{\omega^4}}{\frac{\omega^4}{\omega^4} - \frac{2 \cdot \omega^2 \cdot \Omega^2}{\omega^4} + \frac{\Omega^4}{\omega^4} + \frac{4 \cdot \delta^2 \cdot \Omega^2}{\omega^4}}$$

Se adess i butoma  $q = \frac{\Omega^2}{\omega^2}$  e  $\psi = \frac{\delta}{\omega}$  as oten:

$$A^2 = \frac{\frac{\Phi^2}{\omega^4}}{1 - 2 \cdot q + q^4 + 4 \cdot \psi^2 \cdot q^2} = \frac{\frac{\Phi^2}{\omega^4}}{(1 - q^2)^2 + 4 \cdot \psi^2 \cdot q^2}$$

Tnima cont che nòstra variabil a l'é  $\Omega$ , e pér trové el massim d'A i sercoma el minim dël denominator. Derivand rispét a  $q$  e ugualiand a zero as oten un minim pér:

$$q = \sqrt{1 - 2 \cdot \psi^2}$$

Sòn a dis che nen sempe un massim a-i é. An efet, pérchè a-i sia un massim ant èl camp real, a venta che l'espression sota radis a sia nen negativa. A venta donca che a sia  $\psi^2 < 0,5$ . Sòn a veul dì che le resistense passive a venta nen che a sio trop grosse.

Se  $\psi^2 > 0,5$ , l'ampièssa a diminuiss an manera costanta con èl chérse dla frequensa dla fòrsa esterna (dàit sperimental) mentre se  $\psi^2 = 0,5$  antlora l'ampièssa as manten motobin costanta fin-a a  $\Omega = \omega$ , e peui a comensa a calé.

Pì cit a l'é lë smortament, pì àuta a l'é l'ampièssa massima. An teoria, se a-i fussa nen d'autut dë smortament, pér qualunque intensità èd fòrsa, l'ampièssa massima a tirerà a andé a l'anfinì.

La condission dl'ampièssa massima a ven dita **arsonansa**.

Se i vardoma cos a fa la fase dl'ossilassion rispét a cola dla fòrsa esterna, i vèddoma che, an condission d'arsonansa le doe ossilassion a son sempe an quadratura, vis-a-dì che a l'han na diferença èd fase ugual a  $\pi/2$ . Pér frequense forsà pì basse èd cola d'arsonansa la fase a tira vers zero, pér frequense pì àute a tira a vnì ugual a  $\pi$ . Pì la resistensa a l'é cita, pì la fase a varia ampressa ant l'antorn dl'arsonansa, coma as peul vèdde an figura 5, andova a ven mostrà, an fonsion dla frequensa "d'ecitassion", ampièssa e fase con  $\psi$  pijà coma parameter. La figura a l'é mach andicativa.




Figura 5 – Ampiessa e fase antorna a l’arsonansa

## Ossilator cobià

Acenoma mach ampressa e qualitativament a costa question. Is arferoma a figura 6.




Figura 6 – Ossilator cobià

As considero doi ossilator istess, e donca con l’istessa frequensa d’arsonansa, che an nòstr cas a son doi pendoj. Ij doi a son acopià da un fil elàstich. Suponoma che an echilibri la tension dël fil a sia cita e che a ten-a quasi vertiaj ij pendoj. Se un pendol, foma col dë snistra, as bogia, disoma a snistra, la tension an sël fil elàstich a chérs e a fa varié la fòrça aplicà dal fil al pendol èd drita. Dal moment che èl pendol dë snistra a fa un moviment armònic, èl pendol èd drita a arsev na fòrça d’ecitassion armònica, che an sto cas a l’è an arsonansa, e a comensa a bautié con ampiessa che a chérs. N’èstudi rigoros a l’è complicà dal fait che as peul nen trascuré èl transitòri inissial.

A l’è ciàir che se èl sistema, dòp èl prim andi, a l’è isolà, l’energia total a venta che a resta costanta. Parej, se èl pendol a drita as buta an moviment e a ossila con ampiessa che a chérs, a aumenta soa energia, che a venta che a sia gavà al pendol dë snistra.

An efét èl pendol dë snistra a riduv man man soa ampiessa, ma a mantén na fase che a-j përmëtt èd cede soa energia a l’àutr, fin-a a fèrmesse, mentre l’àutr a riva a la massima ampiessa. A sta mira èl process as anvert.

Pì l’acopiament a l’è strèit e pì lést a l’è èl process èd trasferiment dl’energia (a-i van meno peròd). N’acopiament strèit a l’è dàit da n’elàstich pì robust, pì dur. Se a-i fusso nen resistense èl process a continuerà a l’anfinì. An pràctica, un pòch a la vira, l’ampiessa massima as arduv fin-a a zero.

A l’è fàcil, da na mira intuitiva, rend-se cont èd col che a l’è ‘l mecanism dël trasferiment dl’energia. Suponoma que ‘l prim ossilator a sia slansà vers snistra mentre lè scond a l’è fèrm. Cand èl prim a riva al massim dl’elongassion (lè scond a l’è ancora praticament fèrm), l’elastich a l’è a la tension pì àuta e donca a aplica la fòrça pì àuta a l’ècond ossilator. Mentre ‘l prim pendol as fèrma pér torné andarera, l’àutr a l’ha la pì àuta acelerssion (ò quasi, vist che a l’è dësgìa bogiasse). Mentre la tension dl’elàstich a fren-a ‘l prim, a accelera lè scond.

## PROPAGASSION PËR ONDE

I parloma d'onde mecaniche che as propago ant na sostansa elàstica. Suponoma che la sostansa a sia sólida, mentre vèddroma àutri tipo d'onde ant àutri travaj, che fòrse i faroma.

### Propagassion èd n'impuls longitudinal

I suponoma d'avèj na sbara elàstica coma cola èd figura , omogénia (densità costanta  $\rho$ ) e con session costanta  $S$ .




Figura 7 – Propagassion longitudinal èd n'impuls

Se i procura n'urt longitudinal a na ponta dla sbara, aplicand na fòrsa  $F$  (valor medi) pér un temp  $\Delta t$  (motobin cit), sota l'assion dla fòrsa na cita porsion dla sbara a ven comprimùa. La pression provocà an sla surfassa da l'urt, a viagia ant la sbara a na dàita velocità, e, ant èl temp  $\Delta t$  andova a agiss la fòrsa, a riva a anteressé na part  $\Delta l$  dla sbara. Ciamoma  $c$  la velocità èd propagassion, pér adéss nen conossùa. I voroma mach fé noté che sì i stoma ipotisand un comportament bin diferent da col èd na sbara an teorìa rèida.

Donca i l'oma n'impuls  $i = F \cdot \Delta t$  che ant èl temp  $\Delta t$  a anteressa la longhëssa  $\Delta l = c \cdot \Delta t$ . Sta part dla sbara a l'ha na massa  $\Delta m = c \cdot \Delta t \cdot S \cdot \rho$

Sto tràit dë sbara, sota l'assion dla fòrsa  $F$  a patiss na deformassion (as èscursa) èd  $\Delta x$ . Second lòn che i l'oma vist a propòsit èd deformassion elàstiche,  $\Delta x$  a val

$$\Delta x = \frac{1}{E} \cdot \Delta l \cdot \frac{F}{S} \quad \text{andova} \quad E = \text{mòdul d'elastissit à}$$

Dòp èl temp  $\Delta t$  la porsion comprimùa a aplica l'istess impuls a la part dla sbara che a ven dòp. Sta part a patiss l'istess process. Donca l'impuls as propaga ant la sbara con na velocità  $c$ .

Da na mira dinàmica a suced che la massa  $\Delta m = c \cdot \Delta t \cdot S \cdot \rho$  as èspòsta èd  $\Delta x$  sota l'assion dla fòrsa  $F$ , con na velocità dàita da  $\frac{\Delta x}{\Delta t}$  e donca la variassion èd quantità èd moviment a venta che a sia ugual a l'impuls arsevù, vis-a-dì:

$$\Delta m \cdot \frac{\Delta x}{\Delta t} = F \cdot \Delta t$$

e i consideroma èdcò che la velocità èd propagassion a l'é  $c = \frac{\Delta l}{\Delta t}$

Se i foma tute le sostitussion i rivoma a la fin a scrive:

$$c \cdot \Delta t \cdot S \cdot \rho \cdot \frac{\Delta x}{\Delta t} = \frac{\Delta x}{\Delta l} \cdot E \cdot S \cdot \Delta t \quad ; \quad c \cdot \rho = \frac{\Delta t}{\Delta l} \cdot E \quad ; \quad c \cdot \rho = \frac{E}{c}$$

e donc  $c = \sqrt{\frac{E}{\rho}}$

La velocità èd propagassion a dipend parèj mach da le carateristiche d'el material, an particolar da soa densità e sò mòdul d'elasticità.

## Propagassion trasversal longh na còrda

I suponoma adéss che nòstr sistema elàstich a sia na còrda tèisa orisontal. I stabilima antlora un sistema d'ass cartesian, con l'ass  $x$  ant la diression dla còrda e l'ass  $y$  ant la diression (normal) dla deformassion. I doma peui na cita deformassion a la còrda, magara con un curt colp trasversal. Is arferima a figura 8.




Figura 8 – Propagassion èd na përturbassion trasversal

As vèdd da na mira sperimental che na përturbassion prodòta ant l'origin as propaga an sla còrda con na velocità che i ciamoma ancora  $c$ . Sòn a veul dì che dòp un temp  $t$ , la përturbassion a l'é spostasse d'un tràit  $c \cdot t$ . Se, ant él sistema d'ass che i l'oma suponù, i podoma dëscrive la përturbassion al temp  $t=0$  coma na fonsion  $y=f(x)$ . Al temp  $t=t_0$  tuti ij pont a saran spostasse an manera orisontal dla quantità  $c \cdot t_0$ . Se antlora i foma na conversion d'ass cartesian e i butoma che  $\psi = y$  e  $\xi = x - c \cdot t_0$ , la përturbassion a resta, an ògni temp  $\psi=f(\xi)$ , mentre l'equassion dla propagassion dla përturbassion as peul scrive:

$$y = f(x - c \cdot t)$$

Imaginoma adess èd butesse a metà 'd na còrda tèisa e d'arferì nòstr sistema èd coordinà a sto pont. La situassion a l'écola arpresentà an figura 9.




Figura 9 – Longhèssa d'onda

Se al temp  $t = 0$  i pijoma èl pont  $O$  e i-j provocoma n'ëspostament ant la diression dl'ass  $y$ , sta përturbassion as propagherà ant ij doi vers dl'ass  $x$ , con velocità, ant l'óordin,  $c$  e  $-c$ .

Se al pont i foma dëscrive në spostament sinusoidal che a l'abia un period  $T$ , a la fin dë sto temp  $T$  la situassion dla còrda a l'é cola dla figura 9 : èl prinsipi dla përturbassion a l'é spostasse èd  $\lambda = c \cdot T$ .

Parèj la përturbassion generà ant èl temp as trasforma an doe përturbassion ant l'ëspassi, che a viagio, ant l'óordin, a velocità  $c$  e  $-c$ .

An efét l'equassion dla propagassion  $y = f(x - c \cdot t)$  a peul esse trasformà an n'equassion echivalenta .  $y = \varphi\left(t - \frac{x}{c}\right)$  che a l'é sempe n'equassion èd la propagassion.

Se èl moviment  $y$  ant l'origin a l'é sinusoidal i l'avroma che

$$y = A \cdot \cos\left[\omega \cdot \left(t - \frac{x}{c}\right) + \vartheta\right] = A \cdot \cos\left[\frac{2 \cdot \pi}{T} \cdot \left(t - \frac{x}{c}\right) + \vartheta\right] = A \cdot \cos\left[2 \cdot \pi \cdot \left(v \cdot t - \frac{x}{c \cdot T}\right) + \vartheta\right]$$

Adess i ciamoma la costant  $\lambda = c \cdot T$  coma **longhëssa d'onda**, che a l'é la distansa che la përturbassion a fa ant un perìòd  $T$ . I podoma scrive

$$y = A \cdot \cos\left(\omega \cdot t - \frac{2 \cdot \pi}{\lambda} \cdot x + \vartheta\right)$$

La grandëssa  $\sigma = \frac{1}{\lambda}$  a ven ciamà **nùmer d'onda** e a l'é èl numer èd perìòd che a-i stan ant l'unità èd longhëssa dla còrda.

## Dinàmica dl'onda trasversal

Is arferima adéss a figura 10, con la sòlita còrda, sede èd na përturbassion.




Figura 10 – Dinàmica dl'onda trasversal

Coma sempe i consideroma na còrda tèisa fra doi pont, omogénia e èd session costanta, con na densità linear  $\rho$ . I consideroma na deformassion vers la metà dla còrda e un tràit infinitésim AB, ant l'óordin, d'assisce  $x$  e  $x + dx$ . A le doe ponte dë sto tràit a son aplicà le doe tension  $\tau_1$  e  $\tau_2$  coma disegnà an figura. I suponoma che le doe tension a sio istesse an mòdul e tangent a la curva. I suponoma peui che l'anclinassion  $\alpha$  dël tràit a sia cito, an manera che  $\cos \alpha = 1$ ,  $\sin \alpha = \tan \alpha$ . Sòn a veul dì che ant èl pont  $x$  i l'oma  $\sin(\alpha) = \tan(\alpha) = \frac{\partial y}{\partial x}$  e ant èl pont  $x + dx$  i l'oma

$$\sin(\alpha) = \tan(\alpha) = \frac{\partial y}{\partial x} + \frac{\partial^2 y}{\partial x^2} \cdot dx \text{ con tute le derivà calcolà ant èl pont } x.$$

Antlora i podoma supon-e che le component dle tension second j'ass a sio:

$$\text{An } x: \tau_{1x} = -\tau \cdot \cos(\alpha) = -\tau ; \quad \tau_{1y} = \tau \cdot \frac{\partial y}{\partial x}$$

$$\text{An } x+dx: \tau_{2x} = \tau \cdot \cos(\alpha) = \tau ; \quad \tau_{1y} = \tau \cdot \left( \frac{\partial y}{\partial x} + \frac{\partial^2 y}{\partial x^2} \cdot dx \right)$$

L'arzultant dle doe tension a l'ha donca component longh l'ass  $x$  ugual a zero, mentre la component longh l'ass  $y$  a l'é:

$$\tau \cdot \frac{\partial^2 y}{\partial x^2} \cdot dx$$

e costa a l'é la fòrça che a agiss an sël tràit  $AB$  infinitésim dla còrda. La massa dë sto tràit a l'é  $\rho \cdot dx$ . Donca i podoma scrive la relassion dla dinàmica che a dis che la fòrça a l'é ugual a la massa pér l'acelerassion. Vis-a-dì:

$$\rho \cdot dx \cdot \frac{\partial^2 y}{\partial t^2} = \tau \cdot \frac{\partial^2 y}{\partial x^2} \cdot dx$$

e donch

$$\frac{\partial^2 y}{\partial x^2} = \frac{\rho}{\tau} \cdot \ddot{y}$$

Se adess i butoma che  $\frac{\rho}{\tau} = \frac{1}{c^2}$  i trovom l'equassion.

$$\frac{\partial^2 y}{\partial x^2} - \frac{1}{c^2} \cdot \ddot{y} = 0$$

che a l'é l'equassion diferensial dle còrde che a vibro, dita èdcò **equassion èd d'Alembert**. La costant  $c$  as arconoss esse la velocità èd propagassion. L'integral general a l'é, an efét,

$$y = f_1(x - c \cdot t) + f_2(x + c \cdot t) \quad \text{andova} \quad c = \sqrt{\frac{\tau}{\rho}}$$

Le doe fonsion  $f_1$  e  $f_2$  a son fonsion qualonque, derivabij almanch doi vire, che a son stabilie da le condission dël problema.

El cas che i l'oma vist as arferiss a la vibrassion ant èl pian  $xy$ . Se as supon che costa a sia l'ùnica vibrassion dla còrda, as dis che la vibrassion a l'ha sto pian coma **pian èd polarisassion**.

## Trasferiment d'energia pér onde

Arpijoma un moment lòn che i l'oma dit a propòsit dla dinamica dle ossilassion. An particolar, èl prinsipi dla conservassion dl'energia a dis che un pont material èd massa  $m$ , che a ossila an manera nen smortà, a l'ha an ògni moment n'energia potensial elastica e n'energia cinética, dont l'adission a l'é costanta.

$$\frac{1}{2} \cdot k \cdot y^2 + \frac{1}{2} \cdot m \cdot \dot{y}^2 = \text{cost}$$

Se i suponoma che lë spostament  $y$  a sia sinusoidal  $y = A \cdot \cos(\omega \cdot t)$  i l'oma:

$$\frac{k}{2} \cdot A^2 \cdot \cos^2(\omega \cdot t) + \frac{m \cdot \omega^2}{2} \cdot A^2 \cdot \sin^2(\omega \cdot t) = \text{cost}$$

Costa equassion a l'é sodisfàta pér tuti ij  $t$  mach se  $k = m \cdot \omega^2$ . Arcordoma peui che a val sempe la proprietà che  $\sin^2 x + \cos^2 x = 1$ . Antlora i podoma scrive:

$$\frac{m \cdot \omega^2}{2} \cdot A^2 \cdot \cos^2(\omega \cdot t) + \frac{m \cdot \omega^2}{2} \cdot A^2 \cdot \sin^2(\omega \cdot t) = \text{cost}$$

$$\text{che a veul dì: } \frac{1}{2} \cdot A^2 \cdot m \cdot \omega^2 = \text{cost}$$

Costa a l'é l'energia, costanta, d'un pont èd massa  $m$  che a ossila con pulsassion  $\omega$  e ampiëssa massima  $A$ .

Tornand a nòstra còrda, e suponend che la përturbassion a sia sinusoidal, soa energia  $dE$  a sarà:

$$dE = \frac{1}{2} \cdot A^2 \cdot \rho \cdot dx \cdot \omega^2$$

I l'oma vist che ël moviment as èspòsta sla còrda con velocità  $c$ . Costa a l'é èdcò la velocità che as èspòsta l'energia. L'energia che ant l'unità èd temp (vis-a-dì la potensa) a traversa na session dla còrda a sarà donch:

$$W = \frac{1}{2} \cdot c \cdot \rho \cdot \omega^2 \cdot A^2$$

## Assurbiment

Ant ij cas reaj, part dl'energia a ven perdùa durant ël trasferiment an sël mojen che a vibra. A-i é donch un coeficent d'assurbiment  $\alpha$  tal che, ant ël cas dla còrda che i l'oma vist, a val l'espression

$$\Delta W = -\alpha \cdot W \cdot \Delta x$$

An efét as vödd che ant la pì part dij cas reaj, la potensa perdùa a l'é proporsional a la potensa midema. Pér nö spostament anfinitésim i l'oma donch:  $\frac{dW}{dx} = -\alpha \cdot W$

La solussion èd costa equassion a l'é dël tipo esponensial:  $W_x = W_0 \cdot e^{-\alpha \cdot x}$ . Adess tnima present che la potensa al'è proporsional a  $A^2$  e donca, l'ampiëssa dla vibrassion, a la distansa  $x$  a sarà:

$$A_x = A_0 \cdot e^{-\frac{1}{2} \alpha \cdot x}$$

Dal moment che i suponoma na përturbassion sinusoidal, l'equassion dl'onda a dventa

$$y = A_0 \cdot e^{-\frac{\alpha \cdot x}{2}} \cdot \cos \left[ \omega \cdot \left( t - \frac{x}{c} \right) \right]$$

## Anterferensa d'onde

Avend sempe com arferiment nòstra còrda, i suponoma adess che costa a propaga doe diferente onde. A-i son vaire cas diferent d'onde che a anterferisso, vist che coste a peulo avèj

frequensa ugual ò differenta con vaire differense èd fase e d' ampiëssa e a peulo propaghesse ant l'istessa diression ò an diression contrarie. Le doe onde a peulo peui avèj doi different pian èd polarisassion. Sì i foma mach un pàira d'esempi.

### Onde con l'istessa frequensa ant l'istess vers

Vardoma figura 11, andova un sistema che a vibra a produv doe onde istesse ant ij ponr A e B. Le doe onde as propago vers èsnistra e i suponoma che an sij doi ram dla còrda la tension e la densità a sio l'istessa, an manera che la velocità èd propagassion a sia istessa. Le onde a son polarisà an sl'istess pian.




Figura 11 – Anterferensa d'onde concorde

El tràit èd còrda  $p$  a l'ha na differenta longhëssa rispét al tràit  $q$ , an manera che le onde an sij doi ram a rivo al pont comun C con fase diferente. Suponoma èd buté l'origin dël sistema d'arferiment giusta ant èl pont C e vardoma lòn che a càpita an sël tràit  $r$  dla còrda. Ciamoma  $\Delta d$  la differensa èd longhëssa dij doi tràit  $p$  e  $q$ ,  $T$  èl perìod dl'ossilassion e  $A$  l'ampiëssa che i consideroma ugual (coma a l'é organisà èl sistema a garantiss che le doe ampiësse a sio uguaj).

Un pont  $x$  qualunque dël tràit  $r$  a arsèiv ij moviment:

$$y_1 = A \cdot \cos \left[ 2 \cdot \pi \cdot \left( \frac{t}{T} - \frac{x}{\lambda} \right) \right]$$

$$y_2 = A \cdot \cos \left[ 2 \cdot \pi \cdot \left( \frac{t}{T} - \frac{x - \Delta x}{\lambda} \right) \right]$$

e èl moviment arsultant a sarà dàit da l'adission dij doi. I arcordoma le fòrmule d'adission pér èl cossen, che a diso  $\cos p + \cos q = 2 \cdot \cos \frac{p+q}{2} \cdot \cos \frac{p-q}{2}$

$$y = y_1 + y_2 = 2 \cdot A \cdot \cos \left( \pi \cdot \frac{\Delta d}{\lambda} \right) \cdot \cos \left[ 2 \cdot \pi \cdot \left( \frac{t}{T} - \frac{x}{\lambda} \right) + \frac{\pi \cdot \Delta d}{\lambda} \right]$$

Costa a l'é ancora sempe l'equassion èd na propagassion con l'istessa velocità  $c = \frac{\lambda}{T}$ .

L'ampiëssa a dipend da le fase dle doe onde, massima se la differensa dle longhësse  $\Delta d$  a l'é multipl antregh dla longhëssa d'onda  $\lambda$  (onde an fase), minima (zero) con  $\Delta d$  multipl dispari èd mesa longhëssa d'onda (onde an contra-fase).

### Onde con l'istessa frequensa an vers contrari

Consideroma adess che dai doi cavion dla còrda a ven-o generà ossilassion, che a viagio pér sòn a vers contrari an sla còrda. Is arferoma a figura 12.

La situassion a sia ancora cola èd prima con onde dla stessa ampiëssa e frequensa. Un pont qualunque  $x$  a sarà sogét a doi moviment dàit da le doe propagassion ant ij doi sens. Suponoma che la fase dle doe onde a sia l'istessa an partensa.

El prim moviment a part da l'origin e a viagia vers drita, l'ëscond a part da la distansa  $l$  e a viagia vers snistra. Ant ël pont  $x$  l'onda dal pont  $l$  a l'ha fàit na distansa (negativa)  $x - l$ . Donca ij doi moviment a son:




Figura 12 – Anterferensa d'onde dëscòrde

$$y_1 = A \cdot \cos \left[ 2 \cdot \pi \cdot \left( \frac{t}{T} - \frac{x}{\lambda} \right) \right]$$

$$y_2 = A \cdot \cos \left[ 2 \cdot \pi \cdot \left( \frac{t}{T} + \frac{x-l}{\lambda} \right) \right]$$

L'adission dij doi moviment a dventa:

$$y = y_1 + y_2 = 2 \cdot A \cdot \cos \left[ -2 \cdot \pi \cdot \left( \frac{x}{\lambda} + \frac{l}{2 \cdot \lambda} \right) \right] \cdot \cos \left[ -2 \cdot \pi \cdot \left( \frac{t}{T} - \frac{l}{2 \cdot \lambda} \right) \right]$$

Costa a l'é pì nen l'equassion èd na propagassion, ma a dis che un pont qualonque dla còrda a ossila con un period  $T$  e con n'ampièssa, che a dipend da la posission, ugual a  $2 \cdot A \cdot \cos \left[ -2 \cdot \pi \cdot \left( \frac{x}{\lambda} + \frac{l}{2 \cdot \lambda} \right) \right]$ . An coste condission as dis che la còrda a supòrta n'onda stassionaria.

I vëddroma che costa situassion a l'é pì che d'àutr teòrica, pérchè ai cavion dla còrda le onde as rifleto e a gionto na neuva anterferensa ògni vira. Sòn i lo vëddoma.

## Riflession dj'onde

An fin i suponoma na còrda con un cavion fiss e da l'àutr a-i sia la sors èd na vibrassion che as propaga arlongh la còrda. I consideroma l'origin al cavion ecità, con ël cavion fiss a distansa  $l$ .

A l'é un fait sperimental che na përturbassion che a parta dal pont zero, rivà al cavion a distansa  $l$ , as arflét andarerà. An efét, l'energia propagà da la còrda a spariss nen, e a produv n'impuls ugual a l'andarera. Se, però, ël cavion a l'é fiss, so spostament a l'é zero, e sòn a peul mach capitè se l'onda che a riva  $y_1$  e l'onda che a part  $y_2$  a son uguaj e an oposission èd fase. Vis-a-dì  $y = y_1 + y_2 = 0$

A la distansa  $l$  da l'origin, l'onda direta a l'avrà espression:

$$y_1 = A \cdot \cos \left[ 2 \cdot \pi \cdot \left( \frac{t}{T} - \frac{l}{\lambda} \right) \right]$$

e l'onda riflessa a dovrà avèj na fase, an pì ò an meno, èd  $\pi$ :

$$y_2 = A \cdot \cos \left[ 2 \cdot \pi \cdot \left( \frac{t}{T} - \frac{l}{\lambda} + \frac{1}{2} \right) \right]$$

An sto pont l'adission dle doe onde a l'é zero. Se i pijoma un pont qualonque  $x$  dla còrda, cost a vëddrà n'onda direta

$$y_1 = A \cdot \cos \left[ 2 \cdot \pi \cdot \left( \frac{t}{T} - \frac{x}{\lambda} \right) \right]$$

e n'onda inversa:

$$y_2 = A \cdot \cos \left[ 2 \cdot \pi \cdot \left( \frac{t}{T} - \frac{l}{\lambda} + \frac{1}{2} + \frac{x-l}{\lambda} \right) \right]$$

L'adission èd coste doe onde a l'é:

$$y = y_1 + y_2 = 2 \cdot A \cdot \cos \frac{2 \cdot \pi \cdot \left( \frac{t}{T} - \frac{x}{\lambda} + \frac{t}{T} - \frac{l}{\lambda} + \frac{1}{2} + \frac{x-l}{\lambda} \right)}{2} \cdot \cos \frac{2 \cdot \pi \cdot \left( \frac{t}{T} - \frac{x}{\lambda} - \frac{t}{T} + \frac{l}{\lambda} - \frac{1}{2} - \frac{x-l}{\lambda} \right)}{2}$$

$$y = 2 \cdot A \cdot \cos \left[ 2 \cdot \pi \cdot \left( \frac{t}{T} - \frac{l}{\lambda} + \frac{1}{4} \right) \right] \cdot \cos \left[ 2 \cdot \pi \cdot \left( \frac{x}{\lambda} + \frac{l}{\lambda} - \frac{1}{4} \right) \right]$$

Costa a l'é torna n'onda stassionaria, che però a ven d'esturbà da la neuva riflession èd l'onda che a torna ant l'origin e a part torna vers l'àutr cavion. As capiss che se la còrda a l'ha na longhëssa  $l$  tala che l'onda as rifleta con l'istessa fase dl'onda originaria, antlora as èstabiliss na vera arsonansa.